

I V B I L E V N I V E R S E L

DE NOSTRE TRES-
SAINCT PERE PAVL PAR
la diuine Prouidence Pape V.
pour implorer l'ayde diuin aux
presentes necessitez de l'Eglise.

*Aucc le Mandement de Monseigneur l'Euesque de
Paris pour la celebration d'iceluy.*



A PARIS,
De l'Imprimerie de FRANÇOIS IVELIOT, Im-
primeur ordinaire de Monseigneur l'Euesque de
Paris, rue du Paon au soleil d'Or, près
la porte saint Victor.

M. DC. XVII.

Au c Privilège du Roy.

4cc 83-101 (227)



IVBILE' VNIVERSEL

DE NOSTRE TRES-SAINCT

*Pere Paul par la diuine prouidence Pape V.
pour implorer l'ayde Diuin aux presentes ne-
cessitez de l'Eglise.*



A VL Euesque seruiteur des
seruiteurs de Dieu, A tous fideles
Chrestiens qui ces presentes let-
tres verront, Salut & benedi-
ction Apostolique. Voicy, les tri-
bulations nous ont saisis, les ten-
tations du diable nous font cruellement la guer-
re. C'est pourquoy avec grande raison nous crai-
gnons que la seuerité de l'ire de Dieu ne tombe
sur nous, car nous entendons venir les oppres-
sions & angoisses vengeresses de nos pechez, &
ceste crainte nous trouble d'autant plus que nous
auons veu ja plusieurs fois les maux que le trou-
peau commis à nostre garde faict, continuelle-
ment, & nous semble que les diuines paroles pro-
noncées par Hieremie resonnent à toutes heures
à nos oreilles, *I'ay en vain frappé vos enfans, & ils
n'ont receu la discipline, ils ont reüteré leurs voyes, &
leurs malices ne sont consummees.* De sorte qu'il est à
craindre que Dieu iuste n'aggraué sa main sur
nous, & que nous cognoissions cōbien il est amer

le prouoquer en nos iniquitez. Partant appaisons le Seigneur en l'amertume de nos ames, & offrant à Dieu sacrifice de cœur contrit & esprit humilié embrassons en ieusnes & pleurs la vraye penitence, enfermons l'aumosne au sein du pauvre, afin que ces bonnes œuvres intercedent & prient le Seigneur pour nous: car il visite en verge les crimes, & en fleaux les pechez, mais il ne destourne pas de nous sa misericorde. Et afin que nous puissions obtenir ceste misericorde, il nous faut avec confiance aller & approcher du tribunal & throsne de sa grace par vnanime oraison, estans memoratifs que les volōtez vnanimas & prieres cōcordantes peuuent beaucoup enuers Dieu Pere de nostre Seigneur Iesus Christ Pere de misericorde: car nous sçauons que le Seigneur a dict: *Si deux de vous consentent ensemble sur la terre, ils obtiendront de Dieu mon Pere qui est au Ciel toute chose qu'ils luy demanderont.* Et afin que cecy se face & execute avec plus de fruct & avec plus grande ardeur d'esprit, suiuant l'ancienne coustume de l'Eglise Romaine Mere & Maistresse de toutes les autres Eglises, Nous auons estimé pour le deub de nostre office Pastoral en ces presentes necessitez auoir nostre recours à vne liberale & ample dispensation du thresor d'icelle Eglise. PARTANT de la part de Dieu tout-puissant le Pere, Fils & sainct Esprit, de l'autorité Apostolique nous prions, requérons, admonestons & exhortons en nostre Seigneur paternellement & de tout nostre pouuoir, tous & chacun fideles Chrestiens de l'un & l'autre sexe estans tant en nostre ville de Ro-

me que ailleurs en quelques lieux que ce soit, d'executer deuotement & accomplir toute les choses cy apres escriptes, & de faire pieuses & feruentes prieres au Tres-haut, afin qu'il luy plaise par les entrailles de sa misericorde exalter son Eglise, & la defendre des entreprises & embusches de ses ennemis, extirper l'heresie, donner la paix & vraye concorde aux Princes Chrestiens, & suruenir aux presentes necessitez d'icelle: Nous confians en la misericorde de Dieu tout-puissant, & de l'autorité de ses bien-heureux Apostres S. Pierre & saint Paul, de ceste puissance de lier & deslier laquelle le Seigneur par dessus nos merites nous a donnee, A tous & chacun fideles de Iesus-Christ demeurans en la dite ville de Rome, qui assisteront aux solemnelles Processions lesquelles nous ferons de nostre Chapelle publique du Palais Apostolique à l'Eglise saint Pierre au Vatican le Mercredy, & de l'Eglise sainte Marie des Anges à l'Eglise sainte Marie Majeure le Vendredy de la presente sepmaine, avec nos Venerables freres les Cardinaux de la sainte Eglise Romaine, & les Ambassadeurs des Princes Chrestiens residans près de nous & du saint Siege Apostolique, tous les Prelats & Seigneurs, tout le Clergé & peuple, ou qui la presente sepmaine cōme dict est, ou la sepmaine suiuant visiteront lesdites Eglises saint Pierre & sainte Marie Majeure, ou l'une d'icelles, pour le moins vne fois, & y prieront Dieu deuotement comme dict est cy dessus, & qui ieuseront les Mercredy, Vendredy & Samedy de

la presente sepmaine ou suiuite, & ayans cōfessé leurs pechez le premier iour de Dimanche ou second, ou pour le moins l'un des iours desdites sepmaines receuront reuerēment le saint Sacrement de l'Eucharistie, & feront des aumosnes à leur volonté, selon que la Charité inspirera chacun d'eux. Et quant à tous & chacun des autres fideles de Iesus-Christ estans hors la ville de Rome, en quelques Villes, Citez, Terres & Lieux que ce soit, qui assisteront à la Procession laquelle sera indiète & faicte par les Ordinaires des lieux, ou leurs Vicaires & Officiaux, ou de leur Mandement, & au defaut d'iceux par ceux qui y exercent la charge des ames, la premiere ou seconde sepmaine apres que nos presentes Létres seront venuës à leur cognoissance, ou visiteront pour le moins vne fois l'Eglise ou Eglises qui seront designees par iceux Ordinaires, & y prieront Dieu comme dessus, & ieusneront les Mercredy, Vendredy & Samedy de l'une des deux sepmaines qui seront par eux deputees, cōfesseront leurs pechez, & seront refectionnez de la tressaincte Communion, & feront pareillement aumosnes à leur volonté; Nous leur concedons & eslargissons par la teneur des Presentes tres-pleniere Remission & Indulgence de tous leurs pechez, telle & semblable qu'elle a accoustumé estre condee aux visitans certaines Eglises dedans & hors la ville de Rome en l'an du Iubilé. Quant aux nauigeans, ou estans en chemin, incontinent apres qu'ils seront arriuez en leurs domiciles, ayans accompli ce que dict est, ils pourront gagner

ladite Indulgence. Et aux personnes Regulieres
 de l'un & l'autre sexe estans en closture perpe-
 tuelle ; & aussi aux autres quelconques tant
 Laiques que Religieux Seculiers ou Reguliers,
 estés en prison ou captiuité ou estés detenus d'au-
 cune infirmité du corps, ou de quelconque autre
 empeschemēt, qui ne pourrōt faire les choses ex-
 primees cy dessus, ou aucunes d'icelles, Nous cō-
 cedōs & octroyōs que le Confesseur qu'ils esli-
 rōt cōme ensuit pourra commuer toutes & chacunes
 les choses cy deuant dictes, ou aucunes d'icelles,
 en autres œures pieuses, ou les proroger en vn
 autre temps prochain, & enioindre des choses
 que les penitents pourront faire & accomplir.
 DESIRANS doncques que tous fideles Chre-
 stiens soient faicts participans de ce tres-precieux
 Thresor, Nous donnons licence & faculté à tous
 & vn chacun de l'un & l'autre sexe, tant Laiques
 que Ecclesiastiques Seculiers & Reguliers de
 quelque Ordre, Congregation, ou Institutiō que
 ce soit, de se pouoir eslire pour cest effect quel-
 conque Prestre Confesseur, tant Seculier, que de
 quelque Ordre que ce soit Regulier, estant des
 approuuez par les Ordinaires des lieux, lequel
 pourra absoudre & liberer au for de conscience,
 & pour ceste fois seulement, de toutes sentences
 d'excommunication, suspension, & autres sen-
 tences & censures Ecclesiastiques dōnees & pro-
 noncees tant de droict que de l'hōme, pour quel-
 que cause que ce soit ; & aussi de tous pechiez, ex-
 cès, crimes, delicts, quelques griefs & enormes
 qu'ils soient, mesmes reservez aux Ordinaires des

lieux, ou à nous & au S. Siege Apostolique, & cō-
 tenus aux Lettres qui ont accoustumé estre leuës
 le iour du Ieudy saint, & autrement reseruez par
 quelconques Cōstitutions des Pontifes Romains
 nos predecesseurs, la teneur desquelles par les pre-
 sentes nous voulons estre tenuë pour expresse:
 & dauantage pouuoir commuer tous vœux (ex-
 ceptez les vœux de Religion & Chasteté) en au-
 tres œuures pieuses & salutaires, leur enioignant
 & à chacun d'eux en tous les cas susdits penitence
 salutaire, & autres choses que ledit Confesseur
 iugera leur deuoir enjoindre, & à sa volonté.

PARTANT par la teneur des Presentes en vertu
 de sainte obedience, nous enjoignons estroite-
 ment & mandons à tous & chacun nos Venera-
 bles freres Patriarches, Archeuesques, Euesques,
 & autres Prelats des Eglises, & quelconques Or-
 dinaires des lieux, & à leurs Vicaires & Officiaux,
 ou en leur defaut à ceux qui ont la charge des
 ames, Que apres qu'ils auront receu les Copies
 ou Exemplaires des presentes Lettres, incontinēt,
 sans demeure, retardation ou empeschement, ils
 les publient & facent publier par leurs Eglises &
 Dioceses, Prouinces, Citez, Villes, Bourgs, Ter-
 res & Lieux; & aux Clergez & peuples leurs sub-
 iects ils indiquent & facent Processions & suppli-
 cations solennelles, & designent l'Eglise ou Eglis-
 es à visiter. Nous n'entendons pas partant par
 ces Presentes dispenser sur aucune irregularité
 publique ou occulte, note, defaut, incapacité ou
 inhabilité en quelque sorte qu'elle soit cōtractee,
 ou donner aucune puissance ou faculté d'en dis-
 penser,

penser, ou habiliter & restituer au premier estat,
 mesmes au for de conscience: Ne aussi à ceux qui
 ont par nous & le S. Siege Apostolique, ou de
 quelque Prelat ou Iuge Ecclesiastique esté excō-
 muniez, suspens, interdits, ou autrement decla-
 rez auoir encouru & estre tombez en sentences
 & censures, ou publiquement denoncez; S'ils ne
 satisfont dans le temps de la celebration du pre-
 sent Iubilé, ou s'ils n'accordēt avec les parties, les
 Presentes leur puissent ou doient aucunement
 ayder: Nonobstant les Constitutions & Ordina-
 tions Apostoliques, principalement celles par
 lesquelles la faculté ou puissance d'absoudre est
 tellement reservee au Pontife Romain qui est
 pour lors, que ny semblables ny dissemblables
 Indulgences du Iubilé & Concessions de telles
 facultez ne puissent ayder à aucun, s'il n'est faict
 d'icelles expresse mētion ou speciale derogation,
 & aussi nostre Regle de n'octroyer aucunes In-
 dulgences *ad instar*, & aussi de quelconques Or-
 dres, Cōgregations & Institutions régulières, cō-
 firmées par serment &c. Statuts & Coustumes,
 Privilèges aussi, Indults, & Lettres Apostoliques
 concedees en quelque maniere que ce soit aus-
 dits Ordres, Congregations & Institutions, ap-
 prouuez & innouez: A toutes lesquelles & cha-
 cune d'icelles, encores que d'icelles & de tout leur
 contenu speciale, specifique & indiuidue, non
 toutesfois par clauses generales, importantes cela
 mesmes, mention ou expression doive estre faicte
 & tenue, ou quelque autre forme requise pour
 cela, doive estre gardee, les teneurs d'icelles par

les Presentes pour suffisamment exprimees, & de mot à autre inferrees, & tenans pour bien gardees les formes dōnees par icelles, pour ceste fois seulement, nous y derogeons spécialement, nommément & expressement pour l'effect des Presentes, & à toutes autres choses quelconques cōtraires. Et afin que nos presentes Lettres, lesquelles ne peuvent estre portees en tous lieux, puissent plus facilement paruenir à la cognoissance de tous, Nous voulons que aux Transcripts ou Copies d'icelles Presentes, mesmes imprimees, souscriptes de la main de quelque Notaire public, & sceellees du sel de quelque personne constituee en dignité Ecclesiastique, en tous lieux & natiōs, pareille foy soit adioustee que l'on auroit aux Lettres mesmes si elles estoient exhibees ou monstrees. Donnē à Rome au Palais de Sainte Marie Majeure l'an de l'Incarnation de nostre Seigneur 1617. le 12. de Iuin, de nostre Pontificat le 13.

Signé, I. B. VEGARINVS.

S. DE VRSINIS. M. DATARIVS.

Registrata in Secretaria Breuium.

L'an de la Natiuité de nostre Seigneur Iesus-Christ mil six cens dixsept, Indiction 15. le 12. Iuin, du Pontificat de nostre tres-saint Pere & Seigneur Paul par la diuine Providence Pape cinquiesme, le 13. les susdictes Lettres ont esté affichees & publiees aux portes de l'Eglise du Prince des Apostres, & S. Jean de Lateran, de la Chancellerie Apostolique, & à la place du Champ Flore, & autres lieux acoustumez de la ville de Rome, par nous Aug. Bracherius & Paul Bartocius Courriers Apostoliques, Silnerius Potirolus Maistre des Couriers.

*A Rome, de l'Imprimerie de la Reuerende Chambre
Apostolique, 1617.*

*Pro transumpto, Signé, G. Archesueue de Rhodes,
Nunce Apostolique. I. Reche S. Th. D.
Et seellé d'un placart en cire rouge.*



EN R Y par la grace de Dieu & du S.
Siege Apostolique Euesque de Paris,
Aux Archiprestres de sainte Marie
Magdeleine & de S. Senerin, & aux
Doyens Ruraux de ce Diocese, Salut. Nous vous
mandons signifier à tous Doyens, Chapitres,
Abbez, Prieurs, Conuents, Communautéz, Cu-
rez, Vicaires, & Superieurs des Eglises de ceste
ville & Diocese de Paris, Qu'ayant veu la pre-
sente Bulle de Iubilé, & reconnu à combiën iustes
causes la main vengeresse de nostre Dieu est ap-
pesantie sur toute son Eglise, receuant les pater-
nelles exhortations & salutaires aduertissemens
de nostre S. Pere le Pape, comme fai&tes particu-
lièrement à nous, qui comme nous faisons vne
des grandes & plus notables parties de la Chre-
stienté, aussi pour le grand nombre des grands &
enormes pechez que nous deplorons s'estre glis-
sez en ceste Monarchie, & peu de sentiment que
nous auons des aduertissemens, menaces & cha-
stimens dont la Bonté diuine a vsé iusques à pre-
sent enuers nous, donnons plus que nuls autres
tres-suffisant sujet aux larmes, doleances & iustes
craintes de ce Pere commun de tous les Chre-
stiens : Et desirans entant qu'il nous est possible
preuenir les terribles iugemens que nous reco-

gnoissons prests à estre executez tât sur le general de l'Eglise, que particulièrement sur cest Estat, auons iugé necessaire de joindre nos speciales & tres-affectiōnees exhortatiōs aux generales de la Saincteté, & enioindre à tous les susdits Doyens, Chapitres, Abbez, Prieurs, Communautéz, Curez, Vicaires, & autres Superieurs des Eglises de ceste ville & Diocese, de publier la presente Bulle en leurs Eglises selon la teneur d'icelle, & admoniester ceux qui sont sous leur subiection & les peuples dont ils ont la charge, tant par eux que les Predicateurs, de se disposer à receuoir avec les preparatiōs y specifiees, vn si grād thesor des graces & biens celestes, comme le plus grand & necessaire moyen qui nous reste pour opposer salutairement à la feuerité de la iustice diuine, implorer sa misericorde, r'entrer en ses graces, & impetrer ses saintes benedictiōs. Et à ceste fin auons ordonné suiuant la teneur de la dite Bulle le Mardy 14. iour de Nouembre estre fait en ceste ville & faux-bourgs de Paris, vne Procession generale, qui partira de l'Eglise de Paris pour s'en aller rendre à l'Eglise des Cordeliers, où sera celebree la Messe du saint Esprit, comme par special mandement il sera signifié, & les iours de Mercredy, Vendredy & Samedy ensuiuans, ou de la sepmaine d'apres, pour ceux qui ne pourront estre disposez, estre fait ieusne particulier, comme aux iours des quatre temps de l'annee, ausquels ou autres iours desdites sepmaines selon la commodité de chacun, tous sont invitez de visiter vne ou plusieurs des Eglises &

Stations qui serōt cy-apres designees, y faire des
feruentes prieres & oraisons à Dieu, afin qu'il luy
plaise par les entrailles de sa misericorde exalter
son Eglise, la defendre des entreprises & embus-
ches de ses ennemis, extirper les heresies, donner
la paix & vraye cōcorde aux Princes Chrestiens,
& suruenir aux presentes necessitez d'icelle, sui-
uant l'intention dudit Iubilé; ausquelles nous les
exhortons d'en ioinde des particulieres pour la
santé, prosperité & conseruation de la personne
du Roy, des Roynes, Monsieur frere, & Mesda-
mes sœurs de sa Majesté, tous les Princes & Prin-
cesses, & tous les Ordres de cest Estat : accom-
pagner les Prieres des aumosnes que chacun est
inuité faire selon sa volonté & puissance ; & en
ceste disposition apres vne serieuse penitence &
confession de tous leurs pechez faicte à vn Pre-
stre Seculier ou Regulier approuué de nous, le
Dimanche ensuiuant ou autre iour de ladite sep-
maine ou suiuaute que chacun aura choisi par le
conseil de son Confesseur, receuoir le plus di-
gnement qu'il luy sera possible son Createur au
sainct Sacrement de l'Autel. Et pour les Paroisses
& autres Eglises hors la ville & faux-bourgs de
Paris, nous auons ordonné le Dimanche 26. du-
dit mois de Novembre pour faire la Procession
en chacune Paroisse & Eglise aux lieux que les
Curez & Superieurs d'icelles iugerōt plus à pro-
pos ; & les Mercredy, Vendredy & Samedy en-
suiuans ou de l'autre sepmaine prochaine obser-
uer le Ieusne qui est ordonné, visiter les Eglises
ou Autels que lesdits Curez & Superieurs desi-

gnerōt pour la plus grande commodité des lieux, y faire les prieres cy-dessus specifiees à l'effect du present Iubilé, & le premier Dimanche de l'Aduent ou autre iour de ladite ou suiuite sepmaine receuoir leur Createur. Et quant aux Maisons de Religion, & ceux qui viuent en closture, comme aussi des Colleges de l'Vniuersité, pour le regard des visitations des Eglises nous en laissons la dispositiō aux Superieurs desdites Maisons & Colleges: Comme aussi des prisonniers, malades ou detenus d'autre empeschement legitime, nous le remettons à la prudence des Confesseurs.

Et pource qu'il a pleu à la diuine Bonté d'inspirer vne sainte resolution en l'ame de sa Majesté, de mettre à bon escient la main à la reformation de son Estat, par la solemnelle Assemblée de plusieurs des plus notables personnages de tous les Ordres de son Royaume, qui se doit commencer peu de iours apres ledit Iubilé, Nous enioignons à tous les susdits Doyens, Chapitres, Abbez, Prieurs, Curez & Vicaires de ceste ville & Diocese de recommander à Dieu par frequentes & affectionnées prieres, tant durant les iours dudit Iubilé, que de la tenuë de l'Assemblée, les bonnes & saintes intentions de sa Majesté en ce tāt louable & necessaire dessein, le supplier d'enuoyer sa diuine Sapience pour assister, gouverner & presider en ce Conseil, en faire reüssir des effects qui soient à son honneur & gloire, conseruation & accroissement de son Eglise, au bien & contentement de sa Majesté, & prosperité de ses affaires, bonne reformation & establissement

de tous Estats, & soulagement general de tous les subjects d'icelle; A quelle fin nous auons ordonné que tous les iours avec les Prieres qui se font pour la prosperité de sa Majesté apres la Messe, il y soit adiousté vne Collecte pour la-dicte Assemblée: & les Festes & Dimanches apres vespres à la fin de la Procession, qui se faiet aussi à l'intention de sadite Majesté, estre pareillement dict vne Collecte pour ladite Assemblée, & continuer si longuement que l'Assemblée durera. Et d'autant que nous recognoissons aussi comme il plaist à Dieu affliger quelques Proninces prochaines de maladies contagieuses de Peste, & voyans par l'indisposition de l'air, chereté & mauuaises qualitez des viures, maladies populaires, & morts soudaines de plusieurs, vrais auantcoureurs de ladite maladie, que les fleaux de l'ire de Dieu qui ont assailly nos voisins sont prests à tomber sur nous, Nous exhortons entant qu'il nous est possible tous nos Diocesains en ces saincts iours de Iubilé, de faire des ardêtes prieres à la diuine Majesté, afin qu'il luy plaist destourner la rigueur de ses chastimés de nous, y employer l'intercession des Saincts, par la priere desquels elle a souuentefois faiet grande demonstration de sa misericorde en semblables maladies, & principalement de saint Roch vn des Patrons de ce Royaume.

*Ensuivent les Eglises qui sont deputees pour estre
visitees à l'intention du present Iubile.*

Le Mercredy les Eglises des Fueillans, des Quin-
ze vingts, & de l'Aus Maria.

Le Vendredy les Eglises de S. Dominique aux
faux-bourgs de S. Honoré, de la Mercy, & de
l'Hospital de la Charité.

Le Samedy & Dimanche l'Hostel Dieu, ou l'E-
glise de nostre Dame de Paris pour iceluy, &
l'Eglise des Filles Penitentes.

Baudouin

PAR grace & priuilege du Roy, & permission de
Monsieur le Lieutenant Ciuil, & de Monsieur
l'Euesque de Paris, il est permis à François Iulliot Im-
primeur ordinaire dudit sieur Euesque, d'imprimer
tous les Mandemens, Ordonnances, Iubilez, Prieres,
Statuts, & autres Decrets qui se font & feront par son cō-
mandement ou de ses Vicaires generaux. Et defences sont
faictes à tous Imprimeurs, Libraires & autres de les im-
primer ou faire imprimer, abbreger ou cōtrefaire en som-
maire ou autrement alterer l'ordre & methode, separe-
ment ou le tout ensemble, sans le consentemēt dudit Iul-
liot, sur peine de trois cens liures d'amende & de confis-
cation des exemplaires & caracteres qui se trouueront
faicts par d'autres, comme il est plus amplement porté
par les originaux des Presentes.

